

友

聲

集

敘

樾齋先生嘗與懋論詩慨然太息曰於戲詩學之失傳也久矣原其所以失者在與樂離而爲二也蓋古人審音但有五聲六律而無平上去入四聲音律不明不足與言詩猶之今人平仄不明不足與言詩也彼疾徐高下詠歎淫泆樂中之節奏卽詩中之宮商舍詩將何以歌然而按詩之體求其所爲疾徐高下詠歎淫泆者則又不可得而譜之試觀三百篇之作不皆出於士大夫之林凡布衣野老婦人孺子蹙口出聲自成天籟悉爲太史所采播之樂章奏之朝廷其果有譜可按乎哉無

非律呂之明自然應絃合節音韻鏗鏘耳甚矣詩與樂相爲表裏者也三百篇之外其可嗣響者莫如離騷自是一變而爲樂府再變而爲五言古體三變而爲三唐律詩風雅廢矣然猶可歌者也唐以後詞日盛宋以後曲日興而論詩者專主平仄學古體則以生梗放軼爲新學近體則以對偶綺靡爲工遂至如狂瀾之倒不可復挽詩非古而樂亦非古矣且人豔稱唐詩以爲武德至開元若何開元至大庾若何其亦知唐詩之盛學者宗之何也蓋其時詩不廢歌如清平調三章始脫隳遂播諸管絃也故有唐一代之詩上古流風餘韻猶有存

焉者也甚哉詩與樂合則詩盛詩與樂分則詩亡其所
關係者豈淺尠哉內則曰十三學樂誦詩可知童而習
之詩不離樂也世子篇曰春誦夏絃可知時而習之詩
不離樂也然則求詩於古其先講樂乎則又有難焉者
蓋講樂必先考律考律必先定黃鍾黃鐘爲聲氣之元
細若氣微若聲聲和氣應則十一律之聲始定然其制
不一漢則求之於尺晉則求之於金石梁隋以降又參
之以秬黍遙遙千載將何適從古來精於律者如遷固
而遷知律生聲鐘生律猶不知律經聲緯之遞變固知
九分之圍八百一十三分之積猶不知旋宮環轉乘除

規圓之圖况後人萬不如遷固又何從按其中聲以講樂乎夫至講樂而後求詩則必與人言詩人惟恐臥矣然則如之何而可曰以三百篇爲宗固已其次離騷漢魏宋晉則有俟乎宋擇者反覆熟讀讀之益精心與古會恍如絲竹奏於前恍如鐘呂聞於耳夫然後志之所之汨汨然來於筆端任天地風雲草木鳥獸之狀類憂深思遠悲愁感憤之鬱積舒縮頓寫其中諧音轉協與聲之高下皆宜千載而下而仍歌詩其詩必掌於太師矣虞書曰詩言志歌永言懋聞先生之論而歎先生之粹於詩也有由來矣今琴海集將付剞劂先生屬爲序

懋曰昔黃文節有云凡作序行及記爲無足信於世待
我而後取重爾懋不才不足爲先生重而先生之詩自
足以爲世信爰卽先生之論志於簡端先生之苦詣於
此乎見風騷之墜緒亦於此乎繫云海禺宗德懋謹志

秦晉詩存卷之上

宿遷陳玉鄰樾齋著 鴛湖王 相惜庵輯

望太白山雲氣

太白有靈窟潛虬託蒼鱗歎爲六合陰喻納羣山雲我
來神雨餘極望林麓分羣山俱朗列太白獨細縕得毋
萬靈朝旂旒紛飛翻或如翔鶴勢或如游魚文滉漾迎
日流連蜃御風奔乍驚孤角露長接遙天昏端倪不可
測恍惚難具論明當陵九厓杳靄詢元君

太白山禱雨

祇役遂仰止清齋休下方質明厲絕禩晦雨陵蒼蒼萬

仍壁鯨額千盤路羊腸捫蘿氣震懼踞石魂清涼若有
山阿人披雲敞我旁薜荔簾翠洞莓苔繡玉牀仙禽何
睨睨藥草長芬芳興深筇竹健意得軒冕忘薄莫陟飛
岑羣峰俯微茫肅衣薦嘉藻側步窺長廊載宿夢無營
言歸賞未央終招吸景客連臂蹋虹梁

仙游山

元潭闕陰獸蓄黛凝不流下趨亂石間噴薄聲無休陽
厓窺翠洞玉女丹泉幽吹簫人不見山鳥空啾啁隔波
旃檀林清磬招我游離立兩斷岸孤槎度千秋興因追
險發步已陵空投龔僧笑相迎三問無一酬悠然生靜

悟自遶香臺周雲來松石靈人去猿鶴愁誓將捨塵物
訪藥此淹留

雪中登華山宿青柯坪而返

陽厓冰布壑陰澗雪蘊石豈無山中人不見去來迹覘
景未激霽衝寒遂登厯漫漫十八盤將半已昏夕天光
露旣窄雲氣歸更密照曜積潔暉捫蘿度嶽仄翠微犬
聲出忽造靜者室疑我鬼耶仙張鐙禮塵客飼我青精
飯酌我丹泉液世外結綢繆恍然舊知識就問三峰路
不言意莫測詰旦覓雲梯玉壺絕罅隙

春日華州城南紀游

日余蒞少華密邇蒼山麓瘡痍撫黔黎愀焉罷游矚春
雲漲莫壑竟夜雨沾足霽景川樹幽輕風散樵牧乘暇
出近郭杏花明蔀屋清流宛轉通左右帶修竹名藍露
遠岫飛磴臨深谷欲躡翠微行巉巖知幾曲詎用窮登
頓聊將娛耳目拳拳望歲心但愛麥田綠

游白厓湖有感

在華州城東舊名移山潭州人郭宗昌易今名

春游白厓湖湖水漸欲竭下馬詢居人憂心坐成結此
湖近千頃倒景羣嶂列鳧雁疑江湘龜魚忘溟渤曠觀
自疇昔勝賞頓消歇去秋嗟無粒今歲望有麥片雨不
終朝三農意頗切何日邀靈貺重陰潤萬物習習谷風

興隆隆山瀨發郊原徧沾足畎澮通曲折邠眺白厓湖
煙波淼空濶

晉祠

辭家宦三輔竊祿踰一紀又舍秦川人來窺晉祠水泉
出懸釜麓潺湲趨澗止膏彼萬頃田歆此千春祀臺駘
障大澤聲錫膺帝祉兼復宣汾洮厥功良亦偉孰知微
禹歎前有金天氏遺祠舊崇飾再拜肅仰止周檜偃輪
困唐碑屹巍磊招提未徧覽日落衆山紫娟娟碧流轉
澹澹神飆起荇帶引尋常魚梭躍尺咫澄觀淨冰雪靜
聽諧宮徵殆過成連琴泠泠入心耳榮名如旦莫至道

何終始幽幽湍瀨芝采采長已矣

白人巖

代州城西三十餘里
爲晉時慧遠道場

游侶約歸雲秋空雨初歇翩翩羨高鳥早向嵐翠沒鳥
沒不可尋雲歸倏已滅我來何所見愛此泉樹別寸壤
了無資尺波從未竭輪囷倚崩峭滴瀝鳴竇穴選勝輕
嶮巖探幽竟曲折傳聞自晉代梵宇舊森列俯仰幾廢
興荒榛蕪斷碣相逢采藥人指點爲余說夜夜颼颼啼
遠公臺上月

明妃怨

過雁門作

祁連風雪路崔巍漢使羈留每不回偏是君王難失信

馬駝春色向龍堆

于役皋蘭途次寄何蘭庭長安

樂莫樂兮見故人出門西笑意先親生憐九月長安道
紅樹新霜與換春

別來廿四橋邊月在苒星霜廿四秋賸有風流何水部
挑燈重與話揚州

過平涼宿賀懋堂廣文齋中

雲中元鶴如相導滿眼空同秀色開驀地到門呼賀老
二千里外酒人來

與君小別已三年襍被來尋子敬氈爲道明春決歸計

枚皋里畔泊曾船

彈箏峽

趙女如花攏慢弦曲成密意向誰邊無端遠過彈箏峽
坐聽流波一惘然

王母宮

青鳥迢迢信不通行人悵望隴雲東廣成近在空同卧
穆滿無心順下風

邵平居

一炬西風冷絳霞亡秦不及故侯家只今過客青門外
尙訪東陵五色瓜

博浪沙

博浪沙中亡命人，入關終殄虎狼秦。
一般不中皆天數，留恨蕭蕭易水濱。

項王廟

亡秦端藉楚重瞳，功並虞庭翦四凶。
縱是魂歸戀桑梓，魯人長護墓門松。

漂母祠

淮市難尋胯下坊，行舟長此繫沙棠。
王孫去中齊王餌，爭似無心一飯香。

文游臺

壁社光搖百尺臺，弄珠神女意相猜。
陸沉已謝珊瑚網，那有雞林問價來。

史閣部墳

馬阮當年菊部頭，徵歌一任隔江休。
福王尙有孤臣節，羞斷雷塘水不流。

禪智山光澹曉煙，貔貅曾此駐旌旃。
此心誓與圍城碎，恰占揚州好墓田。

冬散絮衣百領，以衣貧者。友人宗牧厓卽事賦詩，
因而有答。

芳草萋萋長綠淮，南少霜霰十載官。秦中不會冰灞漉，及

茲殊氣候大漠驚沙卷借問雁門關何如太行坂霧霧
雪踰尺冽冽風似剪狐貉蔽重幃凜如坐崖巘道逢無
衣子鶉結不掩骭忽得做緼袍珍裘遜輕暖世事多類
此三隅信可反饑來授一簞醉後羅千醜今年百穀熟
民氣漸舒展瘡痍未全蘇溝壑亦僅免良友漫獎飾鄙
懷滋媿赧何當返蓬華熾榴淮南岸煙火隔前林梅花
先到眼

與牧厓論詩兼及六書音義因成此篇

黃鍾萬化根樂備淑貌躬斯須不可去象勺舞成童是
以古之人鮮不嫻聲容斐然垂著述雅頌各有宗後賢

詩雖多擿拾等鈔備豈不盛文藻無由諧羽宮沿流遂
忘源日任狂瀾東我友一俯仰憂心鬱忡忡乃今若谷
懷下問逮顓蒙輕塵敢自秘聊以益華嵩簫韶出重華
大武成姬公千秋兩作者零雨繼薰風夏濩亦在懸罔
感尼山聰紛紛較德遇坐井窺蒼穹何異魯東門爰居
駭鼓鐘遂令古音律埽地委蒿蓬音律雖云亡神理無
終窮空籟在天地吹萬何玲瓏所以會心人揮弦送飛
鴻風竹韻蕭瑟石泉響琤琮一觴復一吟眇藐親黃農
太和本洋溢至道無汗隆誰將性情學瑣瑣比雕蟲君
方治六書隱與鄙意同形聲一譌繆篇什讀難通商周

下載前詎識今東鍾偏以誦者叶焉知作者工習非每
勝是舌傲亦奚庸請煩垂露筆爲我揮蛇龍藏之於名
山會有牙曠逢

途次苦寒

斷澗流漸合懸厓凍石裂山路盤積陰衝寒行未歇落
日迷向背遠煙望明滅慄慄坐瓊輿與夫蹋冰窟東風
何時至吹彼榆柳發樹老惜青枝人衰憎白髮不知盛
年樂未斲筋與骨不知絮帛溫未犯霜與雪不知饑粥
美未受饑與渴舟居不知邠文處不知越誰知冰火內
不害蠶鼠活事理本無窮蒙莊論齊物彭殤且一致此

外更何說我雖不逮茲聊用自排撥

轉餉潼關涂次有作

龍在敦牂春二月乙未朔間余何徂征轉餉餽商維商
維號巖險賊來滿郊郭誰者執干戈誰者坐帷幄軍聲
非不壯軍實非不足何難掃毒氛一舉俾清廓蛟螭憚
蛙怒虎豹避羊獍螳斧虛當車驂駟爲退卻我非介冑
士慷慨懷衛霍帶上吳鉤鳴寒光露鋒鏑

官岷木一體嶠指心如抽所至等傳舍斯言何繆悠曰
余捧檄初秦棧陵阻修漢中美風物攀桂樂淹留別來
逾十年夢寐懷舊游誰知蟻蝨盜延蔓西南陬昔也婦

子嬉今也雞犬愁禍患起倉卒焉能豫爲籌因風遙寄
音努力守先疇宣威有羣帥十萬屯貔貅

貔貅何桓桓連營列旌旗軍儲半天下飽我十萬師猶
發內府金會計煩度支使者接冠蓋羽書縱橫飛微臣
敢憚勞踴躍赴程期夙興犯霜霧旣莫忘渴饑客從咸
陽還立馬說戎機賊勢近窮蹙尅日擒渠魁暢然聞此
言輾轉復憂疑前途屢拭目露布來何遲

役竣首歸涂逍遙理輕策山河帶表裏瞻望情何極河
挾汾水東山連太行北王公恃以守厥險非徒設維時
屬春陽萬井趣農穡兒童登壟牧婦女當戶織老翁無

所爲編籬補雞柵熙皞樂

盛代何者是兵革豫警自荆襄秦氛自巴益杞憂良在
茲誰任干城責

仲弓祠二首

顏閔同時列雁行千秋長此奠椒漿漢家文景稱賢辟
黃老才能到子桑

孔門德行先羣哲他日臨民僅緒餘人世但求南面樂
焉能不碎好家居

王猛故里

漢相追賢奉至尊南朝交臂失王孫當年抵掌風生處

也把元戎作虱捫

有客

牧厓困于鄉舉將徙業焉作此諷之

有客策蹇還行行苦趨趨荆山雖完璞遲莫感何如古
賢厚自責末俗漫相諛名成不足欣業墜乃可虞良田
有豐儉良賈有盈虛千秋匪異人得失僅須臾豈以鸞
鶴姿爭食雞與鳧豈以虎豹文並驅狼與狐取舍紛萬
端靜躁非一涂亮貞固窮節至竟聲華殊炳燭薦叢菊
開筵羅野蔬且極今夕歡爲君傾玉壺

茶羹詞

我來秀容歲方晏訟庭草短寒露滋退食每訝茶羹美

云出近郭東南畦暇日聊復與客俱支筇載酒行威遲
纔離城闕意清曠亭皋木落邊雲飛人家潺湲臨水麋
槿花藤蔓編疎籬紅芋紫薑稜未滿冬菘翠色延郊岐
鮮若蕉心向風展腴如薤葉凌霜披脰壘動以萬千計
長年患饑不患饑有叟躑躅前致詞吾儕生業良所資
官府往往當土產取攜似非人力治牛車捆載致衙舍
厨丁入手拋塗泥割鮮行炙未下箸吁嗟此味何曾知
我聞此語俛以思歸而編綴爲新詩乃知股民不在大
一草一木皆膏脂

姚曉園同年多藏書屢借觀覽兼蒙佳釀之惠因

爲長歌道意

君昔作吏嶺海間滿船載書歸故山故山草堂倚句注
滹沱東來向西去流水一去無回瀾而我再至雁門關
雁門食雁非所樂幸有伊人相往還相往還申繾綣那
堪衰鬢參差見公車同賦鹿鳴時三十五年如過電君
今料理淵明菊坐擁縹緗三萬軸開函細細點丹鉛題
籤一一插瓊玉借書得書兼得酒鄒陽吹律意良厚遂
令天涯濩落人耳目發皇氣抖擻乘興何必習家池酒
酣倒著白接離笑向旁人問身手矯健何似并州兒蹴
踏怒馬黃金羈猶能側坐雕窰馳射雉纔經郅都墓呼

鴈旋過晉王祠晉王祠邳都墓更有琵琶出塞路英雄
兒女古今悲野燒荒原愁日莫我有舊業雲水鄉思歸
不歸空斷腸還君書卷載君酒徑訪小山叢桂芳

于役

于役返青門新晴曠旅魂明嵐華陰郭遠樹渭南村驛
古嬌紅杏人勞健綠樽風塵爲干祿鞅掌復何論

秦棧口占

琴泉張靜壑綺樹被秋山聊可快游矚胡爲凋鬢顏澗
嬉猿叫歙林宿鳥翻翻應怪塵纓客勞勞過此間

偕友人底店看桃花

在寶雞城東三十里

事事着都懶招尋興尙餘兩三斑鬢客遠近碧桃花橋
斷乘沙輒蹊成入麥斜生憎歸騎促直欲卧田家

娑羅泉次蘭庭韻

在寶雞城外

翛然松石意不必在高深爲試娑羅水來游蒼葛林洞
幽空相滿庭暖靜塵侵小憇還歸去無僧叩定心

夏夜卽興同劉秋田

勝侶成談癖涼宵破暑醒星河天四遠風露月孤清絲
竹中年興江湖萬里情夜闌鷗鷺夢近傍北窗生

登恒山有述

北嶽無奇特幽幽鎮元都猶如古先民抱璞超瑕瑜我

來屬暮暮雨雪方載涂况復崩崩巖風砭肌膚翼
松蓋仆逝石泉珠枯惟有澗底冰嵯峩留秦初就尋紫
芝谷翁施光已無靈根諒終秘輟策增脚躡終焉陟層
顛頓覺衿抱舒羣山類波蹙一一標稜觚微芒辨玉屋
杳靄分飛狐旁薄一氣中縱橫千里餘陰陽此終始孰
測造化樞會逢蓬萊人同證真形圖

晉陽對雪

日炙晴雲龜兆裂雲上蔚藍雲下雪須臾雲淨雪晶瑩
野色山光帶城闕塞垣北望倍蕭瑟嶺路東行逾峭折
晉澤離離雁鴛稀汾河淦淦冰凌結懸車不作郊郭游

衙齋向晚風颼颼鵝黃可愛試新釀狐白無溫挾故裘
論詩卻笑柳柳州寒江蓑笠翁何求他時我亦扁舟客
但釣煙波春夏秋

雨不止

爲明督師孫忠靖公作也

氓也而爲賊相機事勦無勦氓如剗羊撫賊如縱虎賊
日殺吾氓萬口莫敢譁殺賊等殺氓一矢誰敢加寇深
始倚界廟堂乃遙制竭力掃欃槍束身就犴狴再起嗟
何及糧匱雨中立有明社稷竟淪亡淫雨不止天地泣

雁門關

遠山雪白近山紫北上雁門三十里晴雲如波渟不流

暗轉山腰度山背行行谿谷日漸午人馬浸淫汗若洗
下馬飲泉上馬渴行人苦渴居人喜其道塞垣寒最早
早霜殺菽尋常耳今年九月氣如春豐稔祥和乃致此
我聞好語頗慰藉倏忽煩蒸去肌體曲曲折折慙層阿
蒼蒼茫茫尋故址自昔三關共設險平刑甯武屹相倚
祇今中外等一家不用防秋空壁壘邊氓遭際抑何幸
振古安樂無與比牧羊羅雉長兒孫不見兵戈至老死
徘徊瞻眺意何限大漠長風迎面起氣候轉瞬變溫肅
陡覺陰山在尺咫歸路斜陽盡角悲潏潏斷澗冰生水

初冬喜雪

邊氓不種冬麥亦向來習俗使
然非真不可種也詩以示之

陰陽橐籥暗翕闢造化神奇難揣測微微三日兩日風
了了千山萬山雪野人祈穀重三白天女散花成六出
都教比屋泯參差頓使歧涂歸畫一色光可暫亦可从
言語誰工更誰拙因物肖物平等心蹈空還空清淨力
夜誦聊將照尺牘朝吟不許持寸鐵有客臨觴意憮然
閭閻生計關胸臆相傳晉塞寒獨早七八月間犁耙歇
我來二稔殊所聞氣候未與秦中別快晴今日便和暖
泉脉融融凍紋裂閑田可惜盡膏腴付與沈煙野燒黑
愚氓積習驟難解官長徒然煩譬說從來琴瑟待更張
况復璣衡露消息嘉苗不得徧中土珍果云何來外國

明年播種秋分前雪後連雲觀宿麥

雨中同李定園明府游晉祠

素雲萬頃如波流元雲蔽日如覆舟山城一夜雨不歇
晨起端坐懷百憂檐溜衝激聲無休坳堂直欲浮羣鷗
卯飲昏昏意緒盡登臨何處豁兩眸一峰先晴破雲出
雲氣嵐光遞明滅仙鬢窈窕膏沐新詎道相看未相識
四郊徧是泉瀲灩十里何妨泥滑滑流水千家復萬家
涼天五月如八月晉祠游蹤卻再來招攜幸有青蓮才
長生之殞共采擷弄波跂石方悠哉泠泠靜與琴筑諧
瑠璃那受纖塵埃憑欄見底不見影空際游鱗紛往回

沙禽對我鳴野衲導我步臺高寶幢現林密清磬度寓
目延幽賞息機生妙悟蕭然空山無古今花落花開自
朝暮躡薛磴陟菌閣岩堯金界倚寥廓夕陽歸騎且遲
留又有輕雷散雨腳

送牧屋游晉祠

日出魚尾明朱霞穿林浥露香棗花籬落猶餘夢蝴蝶
池塘徧是官蝦蟆涼天五月如八月流水千家復萬家
莫戀晉祠東畔路鷗盟歸去尋圓沙

春日雅集

有鳥鳴高樹適然移我情花開風雨定客至詠觴清顧

曲邀公瑾臨池泥伯英騷場馳騁態知舊許生平

吳山

百二全秦鎮金天秀五峯嶙峋迎海日縹緲帶雲松聽
瀑晴吹雨窺潭影動龍霜林下山路彩翠萬千重

東湖

天清木葉脫倚樹聽鳴泉有客奏瑤瑟令人懷水仙飛
來空外鷺閑繫鏡中船不盡孤吟意滄洲共渺然

送何蘭庭南歸

薄宦均非策輪君且暫歸去程隨雁遠回信得魚稀峰
雪界空碧溪雲擁夕暉天涯歲邁盡坐使素心違

春日游西溪分韻得農字

流水非人境迢遙寄遠蹤清溪閑野鷺小雨寧春農草
碧煙中陌雲陰霽外峰羊求棲隱處惆悵未曾逢

七夕小集

隨意成觴詠新涼景最幽牽牛花蔓夕促織草蟲秋露
下衣初薄河傾漏漸道小詩吟未穩化作彩雲流

卽興答友人

勞生已過半薄宦轉蹉跎客鬪尊前健詩敲馬上多絳
雲舒曉嶂金氣溢秋河家在清淮曲行當理釣蓑

除夕飲集

歲月堂堂去人心重一宵賸將分寸惜積此古今遙白
髮燈前雪朱顏酒上潮春風已多事吹斷漏迢迢

洪洞

煙樹靄千章行人五月涼鷗羣浴在渚女伴浣橫塘雨
歇山泉溜花闌野藕香塵纓聊可濯此地卽滄浪

初至晉陽題丞署壁

髮爲親民白官從佐郡閑能消清况味漸有好容顏菱
苻祠前水桑麻郭外山幽尋意無已誰與共游盤
游盤無與共望古倚徘徊大澤藹平陸堯城安在哉嶽
雲興霍太時雨協恢台愛此嘉禾秀悠然進一杯

一杯聊自適安止卽吾廬寸祿家全飽長筵客半虛行
年驚大衍垂暮惜三餘好向清吟暇逍遙綜簿書

我口 在繁峙縣境

我口文殊院心知近五臺諸天空梵合絕域異僧來沓
嶂屯冰雪飛淙挾雨雷未遑金界宿引領獨徘徊

白雲寺

鐘鼓清涼境禪棲占白雲一林散花雨千嶂隔塵氛法
侶如曾識名言得未聞淹留松下別前路已斜曛

韓侯嶺懷古

路近叢祠馬不驕天風策策振松濤行人若記分羹語

不替王孫怨漢高

心事青天白日同
未央慷慨歎藏弓
如何相背生羅織
鼎鑊無端嚇劊通

自置股肱還自翦
牝晨堪歎亦堪羞
假饒一例誅平勃
馬上山河不姓劉

重瞳廟祀也烏江
蓋世英雄氣未降
天上相逢應把臂
千秋智勇各無雙

秦晉詩存卷之上終

秦晉詩存卷之下

宿遷陳玉鄰樾齋著

鴛湖王

相惜庵輯

游方山用吳徵君韻

路轉山坳罨畫村村煙山靄合無痕浣衣女散苔侵石
采藥人歸犬候門

名藍三面翠巖圍階下流泉樹杪飛一自唐賢注經後
幾人雲卧冷裳衣

茯苓堪餌不論方野菽山肴喜脍涼丈室維摩容我住
何須歸去築秋場

絕頂亭亭偃蓋松諸峯一一青芙蓉七月八月徧霜葉

秦晉詩存

卷之下

上方下方連午鐘

見牧厓得鄉書口占

回首鄉山歲又殘
寒垣風雪路漫漫
盼書書到心翻怯
顛倒平安兩字看

跪剖雙魚六六鱗
悠悠萬事等飛塵
將身早致青雲上
歸慰方瞳白髮親

書蓮洋集後

五言漢魏接風詩
樂府聲情近楚詞
後世紛紛工近體
採源星宿幾人知

陶彭澤後韋蘇州
古調激昂無與儔
不道蓮洋詩墜緒

遙遙千載瓣香留

上書報罷承明廬野鶴孤雲任所如廣坐賦詩興不淺
梅花長憶山中居

門前河水河上山晴蓮削出青孱顏桃花千樹魚論尺
曾有詩人此往還

同時文藻盛王朱誰數條南一腐儒至竟聲華歸論定
淵然獨有握中珠

至寶心知不可名悠悠薄俗任相輕輸他狡獪麻姑爪
故遣丹砂擲米成

詩中往往涉名理源亦出於三百篇莊老何曾愛山水

鈍根人始入枯禪

疾中呈宗牧匡言可樵

微疾忽若失良朋具在茲蘭言齊臭味蔬食爽心脾遠
堞暮吹角閒堦風折枝近來情力退一一靜中知

餽問饒珍物邊關十月初蛆浮香糯酒冰裹石華魚道
味虛探索心塵費埽除藥言當不吝我友意何如

壽陽旅次有懷舊使君呂綺園

水未改清淺山還接翠微鳴琴人已去投轄事全非燭
閃林棲翮螢黏露坐衣城南寄孤館惆悵素心違

我友困塵網罷官仍未還天垂孟諸野雲擁太行山五

畝亦何有千秋非等閑窮愁著書暇詩卷幾經刪

貫串書千軸沈酣酒百罇論交堅古誼作吏屈清才事
拂殘碁過人尋小劫來雨餘松下石斑駁點蒼苔

綺園
喜與

子奕
故云

杯泛琅玕綠衣分薜荔涼山城颯風雨曾此賦重陽高
會誰能繼繁憂不可忘年來幽砌畔殘菊幾枝芳

芹泉驛

試訪芹香處泉聲驛舍西最難山有樹大好路無泥細
浪吹沙輓高虹截雨齊天涯芳草色向客故萋萋

被役甘桃驛督餉十餘日其間風景不無紀述詩

成之餘還自和焉爰得三首寄呈省中諸友

僚慄空山曲裁詩寄晉陽人聲谷響應虎氣日蒼涼倦
耳交鈴馱衰顏付藥囊何時共清話列坐引壺觴

白晝林氛合嵯嶢見夕陽雲蒸衣絮溼月浸簟波涼夜
夜屏官燭朝朝支隱囊縱無良醞戀圖醉亦稱觴

深巖安氣候詎假變鄒陽亦有新禾綠偏於盛暑涼澗
香薰屐齒松露滴琴囊來者覩題壁知余此舉觴

喜賀懋堂至賦呈

憶昔追游處花繁鄴杜春樽前無事日鐙下苦吟人獻
策君辭里移官我問津相逢兩載別烽火話三秦

聞說南山盜憑陵，颯若飛蛇虺。張霧毒虎豹，喜人肥上
相遙專閫將軍迅，解圍一尊相慰藉。驚定轉沾衣。

不遠二千里，崎嶇杖策臨。條南泥阪滑，冀北凍雲深。契

濶彈雙淚，綢繆結片心。近知歸路穩，蓮嶽試同尋。子將有潼

關之役，約與懋堂同行。

碧玉晉祠水，非君勝賞虛。沿流散蘋藻，采采意何如。路
轉聞清磬，臺高見遠漁。人家隔浦澗，不異輞川居。

送牧厓應試入都

獻策金臺近，驪歌酒再行。文章持報國，慷慨坐談兵。此
地山河壯，何時蜀隴平。書生淡榮寵，攬轡志激清。

兩載偕并代蒼茫眼界開高雲屯上黨積雪曜中臺君
去閑詩筆吾衰賸酒杯他時在騶從已翦北山萊

霍州道中

雨餘遵嶺路嶺下卽康莊已報行人穩兼令倦馬良雲
屏隨霍太麥浪接平陽霽日橫汾曲羣鷗拂練光

軍中述懷

時撫軍駐節蒲郡沿河設備

閭弱寡所就飛緣技易窮入官罷弦誦投老厠兵戎地
險峭函接河流解絳通設機待原獸烽火莫教紅
被命留戎幄何時展半籌臨風聞塞管對月引吳鉤靜
慕長源李豪思越石劉曾看氛霧淨鼓柝狎滄洲

宿華州

晨經嶽麓祠夕入華州郭城空徧宿麥風物宛如昨去
茲逾五年耆舊半凋落重與問疾苦安能罄衷曲但言
擾賊氛犬牙互商洛人人懷佩犢在在警風鶴又當關
輔衝師旅過頻數更悉籌供頓歸伍何太速若以爲病
兵頗不見羸弱去時弓在臂歸時箭在握紛紛等兒嬉
不識竟何作兵病民益病眞僞異苦樂僞者生乘車眞
者死填壑致詞未及竟涕淚迸相續爲言汝毋悲邊徼
已清廓鯨鯢行盡翦蟣蝨不足縛早晚露布傳凱旋徹
戎幕我亦免轉餉汝亦邀賜復日高猶欠伸徐起噉餽

粥聞者色然喜遮留驛亭宿豚蹄爲我將濁酒爲我漉
對案不下咽努力盡杯酌接坐霜氣濃荒雞已喔喔

葛藟篇

女蘿附他木弱蔓不自全葛藟庇本根枝葉紛遠延遠
延以泗布漠漠青厓間置身高且危風雨來無端所賴
互摻結飄搖亦獲安給絺良可爲義著葛覃篇含章旣
皎潔被體復輕縷炎威灼肌膚持此勝綺紈良工忽不
察雜彼苾與菅經緯豈不密承筐終見捐自非同性始
膠漆亦徒然奈何含氣儔骨肉相摧殘

忻州野望呈絳園牧厓

極目曠秋塞斜陽迴未沉平林九原潤積雪太行深飛
騎交煙驛征衣急暮砧何當共載酒高詠發登臨

黃葉

一抹衰林色沈沈帶夕陽蕭疎能幾日搖落更他鄉舊
雨人多散新詩句半蒼灞橋折柳地愁絕最難忘

陪祀之役喜晤郭靈邱同年于混元旅次臨別賦

贈

一別六千日相逢難具論小山荒舊業百里拜新恩念
我俱衰白輸君畢嫁婚聊將向禽比名岳慰思存

痊玉崇禋祀虛空寶闕開地形高二華人影逼三台似

踐登臨約誰膺著述才勞生良已幸同飯肉芝回
爲愛頭銜冷棲遲又五年漫勞刺史仗終想孝廉船煙
水淮南路風沙冀北天因君話桑梓尊酒暫流連

留侯祠

紫柏山下

懷古蒼茫薦藻蘋杜鵑啼滿四山春幾爲博浪糜驅客
一變圮橋折節人紫柏生成非自漢碧流宛轉不通秦
報韓已了生平事仙去何勞問假真

謁沔縣武侯祠有述

艱難遇似武侯稀一德君臣此庶幾道卽有莘三往聘
時非甲子豈戎衣中原日夜籌光復正統天人協與歸

垂死不忘先帝在千秋神爽定相依

西風沔上弔殘秋籌筆當年有驛樓豈但才堪兼管樂
須知心獨貫伊周光明不諱街亭役謹慎終停午谷謀
若見子輿應許聖世無論定付悠悠

滕文公廟懷古

戰國相啖食兵戈翦遺黎齊梁席富強徒與暴秦資兼
并亦灰滅縱橫計何施嶧陽一片出萬古留叢祠雞犬
交阡陌餘風靄在茲昔賢此擘畫野老尙懷思我來屬
春陽靈雨徧郊岐緒風變初霽宿麥含新滋稼事紛可
懷羈心聊自怡一廛尙足賴于此結茅茨間訪魯諸生

高談三代時

寶雞歲暮有感

薄宦銷磨已半生，絲毫無補坐山城。
臨河比屋魚成市，過雨層原人耦耕。
鬢影自憐霜霰密，琴心誰識澗泉清。
那堪奔走風塵下，入棧星軺此問程。

五丈原懷古和懋堂韻

層原慘淡經屯甲，清渭蒼茫未濟師。
人替前朝爭正統，鳥隨落葉下空祠。
苞桑暗繫躬耕日，利鈍都忘拜表時。
指點當年墜星地，秋風猶繞斷林枝。

礮溪

林巒森聳磴苔滋流水聲中謁闕祠曳杖已爲天下父
投竿偶作帝王師舊山應憶封齊後古木曾經避紂時
一種清波抱磻石誰堪重釣此川湄

孤宦

孤宦天涯誰與親蕭條歲暮倚欄頻斜陽鼓角城臨水
殘雪峯巒鴈背人舊雨關心多在楚新霜壓鬢未辭秦
因風寄語明年柳莫費煙絲灞上春

九月偕懋堂秋田鑑堂登王氏秀綠亭作

閑園古木畫冥冥與客同登木末亭關上霽雲長帶紫
渭南霜樹尙全青澄空似有詩跳出爽氣都將酒勒醒

秦晉詩存

卷之下

八

聯騎不知歸向晚依依弦月上層垞

癸丑長至日示署中諸友

山水緣深作吏俱翱翔兩輔足清娛絃歌未必蠲民瘼
鼎食徒然費國租輾轉饑寒隨處有艱難雨雪入冬無
天心已許陽和復定有神膏徧麥區

杜基有懷少陵

杜基在華州西溪
舊有少陵祠今廢

路入蒼山日氣微參差林屋鎖煙霏清流已帶桃花出
細雨無妨柳絮飛在昔詩翁渾漫與而今游子愴忘歸
風光恰似曲江曲酒債尋常判典衣

槐雲書屋落成諸友同賦

樵隱同棲事已分
曠觀安用絕人羣
簿書不廢山林樂
尊酒無慙主客文
清晝簾波交遠吹
綠天鳥語占涼雲
閒焚薤葉縹緗裏
一卷離騷手自薰

華州卽景偶成

透迤雉堞蒼山麓
郭裏田疇郭外林
故壘嘶風閒牧馬
晚衙翻影聚歸禽
名場淡定抽身速
詩境清微入道深
霜徑半凋煙草沒
恐成惆悵罷登臨

元夕

城闕蒼龍佳氣蟠
卿雲扶上月團樂
餘寒冰雪憑欄覺
分影星辰入幙看
子夜按殘歌嫋娜
春風吹動酒波瀾

三千里外淮南道輸與嫦娥眼界寬

春雨

漠漠春陰雨竟成蕭疎心眼得雙清
平林煙靄澹如織近郭田疇腴可耕
積雪盡歸千澗響流雲忽放一峯晴
徑須料理看山屐幾處園亭到早鶯

次懋堂華陰玉泉院韻

水石沖澗峭舊間翛然嶽麓卽僊寰
峰窺玉女微風斂亭倚山蓀盡日閒
斷壁蘿煙垂嫋嫋迴溪松籟灑潏潏
青苔滿院禽聲歇賸有幽人獨往還

九日戲呈呂綺園明府

知君性不因人熱作宦偏宜冷壽陽信宿清談捐案牘
留連佳節具壺觴成羣塞鴈來汾水落日霜林接太行
縱飲莫愁明日事東籬滿眼是餽糧

代州述懷

迢遙秦晉紀征程廿載風塵襪被輕未果騎驢入太華
何妨食鴈到邊城滹沱曉月鳴新漲句注涼雲啟夕清
紫塞最愁霜降早嘉禾滿眼繫深情

白仁巖

絕壁生成類削成雲嵐合沓樹回縈千年援據僧樓獻
十里人盤鳥道行坦步煙霞餘老健激懷冰雪及秋清

七星泉畔莓苔石坐聽松濤萬壑鳴

趙家園子小集

闢地城隅帶水隈平林時見鳥飛回居人抱甕閒爲圃
過客彈琴舊有臺曲徑三三秋色滿層巒一一夕陽開
年來萬事渾拋却賸未浮雲視酒杯

楚別駕有載酒再游之約因用前韻促之

清風昨日滿林隈縱賞郊原夜始回野色尙堪偕倚杖
鄉心長欲寄登臺人消宿酒圖新醉菊過重陽耐久開
共道監州無不得定將霜蟹泥傳杯

灞橋

流波瑟瑟雨冥冥
車馬何年得暫停
橋址已於行處斷
柳條莫向折邊青

無定河

轉轉征蓬離本根
塞垣風景倍銷魂
流波漫道渾無定
尙守銀沙舊漲痕

金鎖關

塞上新添兩鬢斑
歸程漸喜近長安
關名金鎖憑加意
莫放邊愁趁冷官

馬嵬戲占

六龍何事竟西巡
方道蛾眉不負人
料得香魂愁夜夜

秦晉詩存

卷之下

二

墓門千古照鈎陳

誰將三尺築荒煙想像梨花古驛邊
一陌無人作寒食
當年枉費洗兒錢

雨淋鈴曲

長生齋殿冷雙星鞞鼓聲高羯鼓停
一曲霓裳隨夢散
空山獨聽雨淋鈴

寄呈家兄蹇夫

寄語淮南問蹇夫卽今婚嫁畢還無
尙堪歸去同垂釣
數頃山田半入湖

水仙

澗蘭汀芷共芬芳
位置明燈寶瑟旁
讀罷離騷彈一曲
水晶簾外月如霜

佛手

拂拂香生靜定中
漫將詩筆鬪玲瓏
瞿曇未必留駢拇
早向拈花一笑空

木瓜

采摘經時味更醇
不雕不剗見天真
小齋相對忘饑渴
直是金蘭耐久人

喜何蘭庭至

道來不來何阻艱
天涯猜慮幾多般
夢魂虛趁江南北

秦晉詩存

卷之下

三

落日行人已進關

月榭風亭待舉尊
蓮華峰下駐雙輪
知君別後纏綿意
不冷蒼山况故人

蘭庭贈畫扇並題句云
截取石梁千丈瀑
披襟六

月扇應寒次韻以酬

飛泉遙傍石梁看
萬古蒼厓總未乾
從此北窗敲枕處
清風長似雨餘寒

偶成

世外煙霞無徑通
空巖流水答松風
誰將萬古蕭蕭韻
散入琴心詩界中

種竹

不為檀欒蔭池沼肯將蒼翠刷
莠苔隨根宿土環新筍
一似僊人拔宅來

秋雨娟娟動涼葉夕陽冉冉明
深枝石闌風細坐蕭瑟
何處暝鐘初到時

條南道上有懷吳徵君

徵君名雲字天章有集曰
蓮洋浦之永濟人卜居王

官谷口其詩最工
古體不愧作者

王官谷鎖舊煙蘿三詔亭荒蔓草多
稱得幽人棲隱地
疎篁高館鍊金鸞

日將詩對華山吟舉世寥寥識此心
一似蘇門人不見

千秋鸞鳳響俱沈

夕次平陽憶發聞喜已兩日有懷四雲溪使君

勞心撫字拙催科循吏從來下考多書卷旁邊開別筆
十年不翦訟庭莎

小園疊石還穿沼無奈栽花興已闌絕倒桐鄉望父老
祝公壽考莫遷官

勞蹤長荷使君憐倦鳥飛飛董澤邊欲誑楚儉留幾日
煙波十里話蒲蓮

不但如歸戀玉觥三年無間弟昆情平陽街鼓中宵夢
直是離家第二程

陪祀北嶽

陰岳崔巍壓厚坤
心知得脈近昆侖
飛身直上三千仞
畢昴垣中預駿奔

神禹泥封詎杳冥
後人惟解述云亭
綴行此夜隨卿月
懸象何人稱使星

望太華

三峯奇麗並殊絕
寶利妙鬢焉得如
夜來玉女洗頭了
弦月飛來作寶梳

落鴈去天不咫尺
蒼龍拔地萬由旬
青蓮搔首昌黎哭
得附名山僅兩人

日出了了見仙掌白雲一西還一東雲自徘徊人自過
竟成交臂失樊桐

乾陵

廟祔無姑意始灰從容神器得潛回換來三百年天下
只費乾陵土一坏

狐媚居然正首邱漆鐙無燄已千秋李家佳婦葬何許
月黑青燐帶雨游

趙北口

塵埃障車騎黯黯朝復暮舍此萬頃波眼明更何處昔
往冰未泮今來柳已絮澹蕩交惠風淪漪媚清曠危橋

十三四倒景相支吾直躡采虹行凌空愁化去洞洞頰
流沫厯厯見州嶼桂棹倘可將吹簫臨極浦欲從採珠
人窈窕隔煙霧惆悵濯長纓踟躕首歸路

王樸園明府諱行儉鄰與同宦秦中十餘年先後
宰南鄭別後聞其罷官留軍中既又聞其仗節
死事心甚壯之恨未知其顛末嘉慶七年春與
公胞弟行端古香山長萍聚曲沃從容話公平
利罵賊事甚悉因掣涕賦此

鬱鬱冬嶺松猗猗春谷蘭草木各有宜人生良獨難險
夷非一境悲樂紛萬端與公千祿初憑軾西入關灞橋

共吟咏韋曲借游盤朝雨涓城樹暮雲秦棧山瓜期適
相代公至我言旋飲我雙桂堂香露墜涼煙舉杯邀弦
月興象何幽偏別來十餘載光景不可攀如何蟣蝨盜
滋蔓荆巴間羽書飛劍外烽火連漢川耿耿報國心遑
云佩已捐爰充上庸役深入絕外援聞公備賊時幕卒
不滿千聞公禦賊時衆潰身獨前聞公罵賊時浩氣薄
雲天疇昔親雅範風流疑晉賢誰知具仁勇談笑輕戈
鋌實繁棄甲徒孔翠標華冠轉眼隨電滅公名千載傳
弔不及裹革哭不及撫棺擊涕爲誰賦春鷓方在原

秦晉詩存卷之下終

樾齋先生少孤負異稟過目成誦年二十登乾隆己酉拔貢卽於是科舉於鄉歷官華陰南鄭寶雞縣令俸滿擢升太原同知歷代沁諸州及潞安府知府均以廉明著稱公餘詩酒自娛不事干謁中間轉餉潼關馳驅燕趙驛壁郵亭揮灑殆遍信乎慧業文人而又得江山之助者矣鍾吾自 國初以來圭美堂自悅集後作者寥寥以先生此集較之當亦如驂之靳也

甘岩王褻之謹跋

記曰先人有善而弗知不明也知而弗傳不仁也族曾
叔祖樾齋公早登賢書壯牧劇郡公餘致力於詩著有
琴海雨簫秦晉詩存諸集胎息少陵浸淫漢魏後之人
不能刻而傳之不仁之愆其何辭焉甘岩承先志刊行
友聲集推公爲吾邑二百年來第一作手闡微顯幽厥
功甚鉅展讀之次感愧交深矣咸豐丁巳十一月族曾
孫環謹識